

Cantidad grandi di sargassum ta menasa costanan Caribense

E islanan den Caribe un biaha mas ta enfrentando un reto ecologico y economico: cantidadnan grandi di yerba di lama sargassum ta flotando actualmente den Lama Caribe y e parti occidental di Ocean Atlantico. Imagenan di satelite y potret aereo saca como 40km nort di Aruba ta muestra concentracionna masivo di e yerba bruin ta move den direccion di costa.



Esaki a keda reporta den un relato di portal noticiero, Aruba.nu. Segun medionan Mericano, e escala di e masa di sargassum e aña aki ta mas grandi cu loke a yega di registra den historia. Cu un superficie calcula di nuebe mil kilometer cuadra, e sargassum ta un menasa pa beach, waf y turismo den e region – maske e temporada di crecemento di e yerba apenas a cuminsa.

Florida ya ta reportando efectonan. E masa di alga ta tapando tuberianan y waf, incluyendo na Miami, y ta causando dolor di cabes pa resortnan na beach. Mientras cu e tapijtnan grandi di sargassum por kibra ainda den lama habri, nan ta bolbe pega hunto na momento cu alcanza e costa, creando un biomasa diki, cu ta hole malo.

Desde 2011, e fenomeno aki

a aparece cada bes mas den Caribe, Golfo di Mexico y sur di Florda.

Iniciativanan local ta purbando di haci uso di e sargassum – manera pa construi cas na Mexico of experimentando cu reciclahe – pero den hopi area turistico, e plaga ta keda principalmente un problema logistico. Mester retira Sargassum manualmente for di beach pa reduci e molester causa pa su apariencia y ho-



lor. E sargassum ta cuminsa putri tiki despues cu sali riba beach, liberando un holor manera sulfur cu hopi biaha ta disgusta bishitantenan.

E aumento den sargassum ta atribui parcialmente na aumento di temperatura di

lama y cambio den coriente di ocean.

Expertonan ta adverti cu paisnan Caribense mester prepara un biaha mas pa un posible fluho di sargassum.

Potret di archivo.

Fundacion Lanta Papiamento

Papiamento 22 aña idioma oficial na Aruba

Diaranson dia 21 di mei Aruba ta di fiesta, como cu nos ta celebra e echo historico cu Papiamento ta idioma oficial na Aruba ya pa 22 aña caba.

Despues di hopi discusion y investigacion Parlamento di Aruba a aproba e ley di Oficialisacion di Papiamento. Esaki a habri caminda pa Papiamento por sigui desaroya manera debe ser y pa e por haya su posicion husto den tur area di comunidad.

Pero esey no a y no ta bay sin turbulencia. Tin hopi obstaculo ainda, por ehempel e realidad cu ainda Hulandes ta e idioma di mas importante den enseñansa y cu ainda ta husga nos alumnonan na nan dominio di Hulandes. Tin tambe e parti di ley cu ta limita uzo di Papiamento den husticia. Un problema grandi ta cu ainda hopi hende no ta con-

sciente di e balor di Papiamento y tin dificultad pa acepta e status nobo aki di Papiamento. Y francamente bisa, tin poco actividad den comunidad, por ehempel di banda di gobierno, pa conscientisa nos hendenan, pa duna nos hendenan e informacion necesario pa nan por haya un actitud positivo relaciona cu Papiamento. Aceptacion di nos idioma y bon uzo di Papiamento no ta bin di mes. A pesar cu por bisa cu pueblo Arubiano stima su Papiamento, nos mester sigui lucha pa un reconocimiento total.

Fundacion Lanta Papiamento (FLP), cu ta celebra 16 aña cu e ta activo, ta invita henter pueblo di Aruba pa bin celebra e logro historico di Oficialisacion di Papiamento. E celebracion aki ta tuma lugar diaranson dia 21 di mei na Biblioteca Nacional den Madurostraat, di 6.00 or pa 9.00 or pm. No mester reg-

istra, ni inscribi. Sala ta habri pa tur hende for di 5.30 pm.

Señora Selvia Lumenier y Señora Carlos Croes lo declama poesia. Tin musica di Gian Giel y Johnny Scharbaay. Ademas lo tin charla presenta pa Señor Ramon Todd Dandré Mag. Ling. y Dr. Joyce Pereira. E representantenan di Wikipedia Papiamento tambe lo ta presente pa duna splicacion. Y ... lo tin algun sorpresa den e programa.

E anochi ta caba cu un brindis pa celebra y pa haya inspiracion pa sigui cu e lucha. Fundacion Lanta Papiamento ta invita henter comunidad pa ta presente na e celebracion aki.

Departamento di Cultura Aruba: Nos identidad, nos orguyo

Awe 21 di mei, Aruba ta celebra un momento historico den su desaroyo cultural y nacional: e 22 aniversario di e oficialisacion di nos idioma Papiamento. Dia como awe, den aña 2003, Gobierno di Aruba a tuma un paso trascendental pa reconoce Papiamento como idioma oficial, banda di Hulandes. Un paso cu a formalisa loke nos pueblo semper a sinti: cu Papiamento ta nos alma,



nos voz, nos herencia y nos union.

Di e momento cu e ley a drenta den vigor, Papiamento a logra un lugar cu e merece den nos leynan. Pero su balor mas profundo ta biba den nos bida diario: den e manera cu nos ta papia, skirbi, canta, studia, y conta nos historia. Papiamento ta e idioma cu ta uni nos sin distincion di raza, religion, origen, ni generacion.

Departamento di Cultura Aruba (DCA) – como pilar pa promocion di expresion cultural y identidad nacional – ta reafirma su compromiso firme pa proteha, stimula y desaroya nos idioma nativo. DCA ta traha sin pausa pa duna Papiamento un rol central den tur actividad cultural, den e arte, den educacion y den comunicacion publico. Nos ta haci un yama henter

comunidad Arubano: mayornan, mucha, educadornan, comerciante y tur esnan cu a scoge Aruba como su cas, pa honra e idioma cu ta caracteriza nos pueblo. Papia Papiamento, skirbi den Papiamento, splica su balor pa nos mes y pa e generacionnan di mañan.

Papiamento no ta simplemente un instrumento di comunicacion. E ta simbolo di resistencia, di creatividad, di union nacional. Ta den su palabra cu nos ta canta nos himno, expresa nos fe, y muestra nos amor pa e isla cu nos yama cas.

Pabien Aruba, Papiamento, alma di Aruba! Laga nos sigui honra bo, stimula bo uzo, y proteha bo pa semper – pasobra bo ta e tesoro mas precioso di nos pueblo, nos raiz, nos voz, nos identidad.

